

E 5 puntonan cu SAC a entregá na ASOMA a wordo rechazá unánimamente

Dialuna a wordo yamá un reunion di urgencia na tur representantenan di banda dor di ASOMA. Di un forma masha grandi mes esaki a wordo atendí pa haya sa futuro di nos músiconan den e temporada'ki. T'asina cu mester aplaudí e forma cu e bandanan a reaccioná tras di reunion aki mirando cu den aña mes esaki su asistencia ta masha pover mes, pero Dialuna último na Dosva tabata impresionante. Cada banda a manda su representante ya cu e punto principal di esaki ta loke SAC a manda ASOMA cu ta contené 5 punto.

Cu ta como lo siguiente:

- 1 - All Star Band pa cada festival esta Roadmarch/Calypso y Tumba
- 2 - Cada banda lo ricibí AFL.700,- pa nan presentacion pa cada festival
- 3 - Fecha 17 Januari pa Calypso y Roadmarch
- 4 - Fecha 24 Januari pa

Tumba

5 - 50% y 50%, esta mitar, mitar pa cada festival.

E puntonan aki unánimamente a wordo rechazá pa ASOMA y su músiconan cu a señalá cu esaki no por. Den e reunion aki a sali na cla cu nan no ta aceptá e puntonan aki y a muestra bon cla lo siguiente:

- 1 - No ta aceptá All Star Band
- 2 - No ta aceptá e suma di AFL.700,-
- 3 - E fecha di 24 Januari ta mas factibel cu 17 Januari.
- 4 - E fecha di Tumba automáticamente mester bira 31 Januari (pasobra ta fin di luna)
- 5 - No ta aceptá 50%/50% ya cu SAC debe ASOMA 50% di 2 aña pasá.

E decision a cai e anochi ey mes y ta muestra cu ASOMA ta bai guerra atrobe cu SAC pa e motibonan mencioná. Shonnan

cos tabata muestra bon te ora e puntonan aki a sali for di lachi. Di berdad esaki ta un situacion hopi fastioso pa ambos partido cu kier haña un bon parti di e bolo di e Festivalnan aki cu ta generá un suma basta halto. Pero mester remarca cu esnan rond di esaki tambe mester hala nan atencion esta esnan cu ta pone luz stage y sonido cu kier bira Miyonario den un solo dia. Prijsnan exagerá pa e eventonan di tipo aki ta masha halto mes.

Si nos pensa esaki bon e festivalnan aki a wordo asina grandi comercializá cu a yega na un punto cu no por controlá esaki mas.

Stacionnan di radio y otro medionan di comunicacion un dia cu nan lanta y bisa cu nan tambe kier haña parti di e bolo aki. Ya cu nan ta e medio cu ta yena e festivalnan aki. Aña pasá nos a nota esaki masha hopi mes ora di Tumba festival ora cu tabatin radiostacionnan cu NO a transmití esaki y Ni a promocioná esaki.

Nos ta conciente cu nos tur tin gana di haña parti di e crema cu tin riba e bolo aki, pero nos tin cu cuminsá nan nos mes. Esta bon un premio hopi bon mes manera tabata e caso aña pasá cu ASOMA cu a entregá nan premionan super laat, pero nan tabatin premionan masha fabuloso en especial pa arreglista, compositor y cantante.

Ban mira con cos ta desarroyá pa e organonan aki cu último 3 añanan aki ta manera azeta y awa.

Nos tin sigur cu nan por, pero como tambe nos a yega di señalá esaki na varios ocasion den pasado. Punto di discusion tin, pero manera di pensa mester ta di un forma hopi madurá pa ambos partido y mira cu esnan cu sali beneficiá di esaki ta nos carnaval cu tur aña tin un "tu-yu-yo" ora toca



e parti di bienes monetario. mester sana e siman aki mes. Alegria y Fantasía lo sigui By the way nos no ta spera cu monitor e situacion aki cu esaki bira un malesa anual.

Eleccion Reina Oranjestad

Ademas di e number di telefon di Tecla Kelly 834862, tur esnan cu kier participá den nos carnaval, específicamente den eleccion di Reina Infantil, Hubenil y Grandi di Oranjestad por tuma contacto pa inscribí nan number serca Suyenne Tromp na 821341 of Gissy Genser na 839756.

Segun e programa tentativo di Carnaval di SAC, ta programá cu e eleccion di Reina Infantil, Hubenil y Grandi lo tuma lugar riba e mesun dia, esta Diasabra 10 di Januari próximo cuiminsando pa 6'or di atardi na stadion di RCA.

Tecla Kelly

Nos por a ripará cu Tecla Kelly tin hopi cos den su man. Su persona ta forma parti esencial di e Comision di Carnaval Oranjestad. Ademas di fungi como Secretario di SAC, inscripcionnan pa Reina infantil hubenil y grandi, prins y pancho, tumberito, Mrs Carnaval entre otro ta na su cargo.

Alegria y Fantasía ta spera cu tur e cargonan aki no lo ta hopi pisa pa Kelly, ya cu sigur lo ta un trabao masha grandi di por organizá y coordiná tur e eventonan aki. Sigur lo yuda di tin un team di coordinador y voluntarionan pa haci su tarea mas facil. Di tur moda ta aprecia si cu un persona ta dispuesto pa invertí asina hopi tempo y dedicacion den e realizacion di nos Carnaval. Despues di tempo nos lo mira e resultado di su trabao.

